



PERDANA LIBRARY
PERDANA LEADERSHIP FOUNDATION
NEWSPAPER CLIPPING

Newspaper	Utusan Malaysia
Date	21/5/2011

Kesihatan Dr. Mahathir semakin baik

KUALA LUMPUR 20 Mei - Kesihatan bekas Perdana Menteri, Tun Dr. Mahathir Mohamad semakin menunjukkan pemulihan menggalakkan selepas dimasukkan ke Institut Jantung Negara (IJN) kelmarin akibat jangkitan pada dada.

Pegawai Khasnya, Sufi Yusoff berkata, perkembangan positif itu dapat dilihat setelah Dr. Mahathir diberi rawatan antibiotik secara intravena dan fisioterapi oleh doktor.

Katanya, walaupun masih batuk sedikit, bekas Perdana Menteri itu mampu mengambil makanan dengan baik dan berbual sambil ditemani isterinya, Tun Dr. Siti Hasmah Mohd. Ali.

"Agak sukar untuk menjangka bila bekas Perdana Menteri itu boleh keluar dari IJN kerana ia bergantung kepada kebenaran doktor yang merawatnya," katanya kepada *Utusan Malaysia* di sini hari ini.

Kelmarin, Dr. Mahathir dimasukkan ke IJN kerana jangkitan pada dada setelah mengalami batuk dan demam.

Pada 2 Oktober lalu, negarawan berusia 86 tahun itu pernah dimasukkan ke Hospital Epworth, Melbourne, Australia akibat jangkitan yang sama sewaktu berada di sana bagi menyampaikan ucapan pada seminar pembangunan manusia anjuran Kelab UMNO Melbourne.

Dalam pada itu, Sufi menambah, doktor turut menasihatkan Dr. Mahathir berehat dan tidak menerima kunjungan pelawat kecuali keluarga terdekat.